



## 八月半

圓圓个月光蹶上東片析个山頂高，光華華仔點亮八月半个暗晡頭。阿梅一屋下人坐到禾埕，禾埕項細人仔在該搞跳格仔，格仔跳啊跳仔，跳入九天堂个望想，跳出脣頭目汁含等个阿梅。該當一屋下人團圓个八月半，無想著老公恁緬心攞貳舖娘子女來走，到今還言有轉屋，毋知有想著一群子女無？還係，既經毋記得還有舖娘子女在老屋盼望，阿梅恤著就目汁濫汨。

亮亮个月光，照等大門前該條轉屋下个路。親朋好友行出行入，就係望毋著阿梅自家老公——阿森个身影。記得有幾下擺暗晡，大家食等夜，家官好好怙怙就同碗筷捫到老公个身項，緊講歿子弟、出差世、妄飯供个……，還做勢愛打老公，盡尾一擺，老公佇毋著就遽遽走，無想著該一走到今，自從就毋識轉屋。

這結局愛怪麼人？怪老人家無了解？怪老人家性體毋好合(gag)壞癖？阿梅想去想轉，愛怪就愛怪自家个老公毋增志啦！當初阿森雄心壯志想愛去臺北發展，家官家娘賣山田、賣茶園，準備好本錢，分自家个俵仔上臺北去做頭路，乜想望自家个俵仔事業順利、賺大錢。麼人想得著？無兩三年阿森个頭路就出問題！逐擺打電話轉講愛調錢周轉，就算係年三夜四，家娘聽啊著，還係一哪仔就去同人撥錢，就像這下赴三點半樣！阿梅恤著，就係自家个老公毋罈煞猛篤實，生理正會失敗貳！

阿森也萬萬無想著，自家會恁失敗！臺北做頭路無三五年，家鄉崇聖宮廟堂愛重建，為著安排重建委員，就用恩主公面前跌筊仔个方式來產生，恁堵好阿森跌著總幹事！佢一心完成恩主公个交代，就膠臺北个頭路，全全交分共下門股个姨表老弟管理。正經無想著，就在無閒重建工作个期間，會分自家个姨表老弟私梟、出賣貳！還害自家个舖娘犯著當時个票據法，分憲兵落(lag)去坐囹仔，四個還細个子女一下無自家个阿姆！正經有罈冤枉、衰過！這情況，麼人想得著？

阿森離開過後，阿梅還係堅心渡等四個細人仔，在大家庭項艱辛生活。逐日起火暖水、煮飯撿樵、孩飯孩點心、田園山事……。日日服侍家官家娘、少郎叔、少娘姑，還愛撐持自家个子女，這種辛苦，無在屋下个阿森敢會知？

光華華仔个月光，點亮八月半个暗晡頭，圓圓个月光，哪時圓滿阿梅一屋下人？

作者：邱一帆

### ☆詞彙學習☆

【緬心】hen<sup>ˊ</sup> xim<sup>ˊ</sup>：狠心。

【撥錢】bad<sup>ˊ</sup> qien<sup>ˊ</sup>：臨時調頭寸。

【目汁濫汨】mug<sup>ˊ</sup> ziib<sup>ˊ</sup> lam<sup>ˊ</sup> gam<sup>ˊ</sup>：淚流滿面。

【恩主公】en<sup>ˊ</sup> zu<sup>ˊ</sup> gung<sup>ˊ</sup>：指關聖帝君、孚佑帝君、司命真君等三恩主。

【歿子弟】mud<sup>ˊ</sup> zii<sup>ˊ</sup> ti<sup>ˊ</sup>：不長進的晚輩。

【跌筊仔】died<sup>ˊ</sup> gau<sup>ˊ</sup> e<sup>ˊ</sup>：擲杯筊。

【妄飯供】nong fan giung：白養。

【門股】deu gu<sup>ˊ</sup>：合股。

【年三夜四】ngien<sup>ˊ</sup> sam<sup>ˊ</sup> ia xi：年關將近時。

【落去】lag hi：抓去。